

OHR: Mostarci moraju preokrenuti sreću Mostara



Ured visokog predstavnika konstatirao je nezadovoljstvo zbog nedostatka napretka koje su proteklih dana izrazili mnogi politički lideri u Mostaru, i dobro je upoznat sa svim uspjesima i neuspjesima u toku protekle godine. Međutim, Mostarci i njihovi politički lideri su ti koji moraju preokrenuti sreću Mostara, a ne međunarodna zajednica.

Mostar nije međunarodni eksperiment, kao što neki političari tvrde sudeći po napisima u štampi, iako je ovaj grad imao sreću da dobije više pomoći po glavi stanovnika od gotovo svih drugih zajednica u Bosni i Hercegovini od završetka rata. Osim toga, obim pružene pomoći i podrške koja je i dalje veoma prisutna, sa historijskog stanovišta je gotovo bez presedana.

U četvrtak, 15. marta, obilježava se treća godišnjica od nametanja Statuta Grada Mostara. Ovaj Statut je izrađen na osnovu kompromisa i nastojalo se uzeti u obzir i uvažiti što više različitih interesa. On se može činiti idealnim ali i ne mora biti. Međutim, jedini način da se Statut izmijeni jeste da bude usvojen u formi zakona i da se nakon toga pregovara o novim aranžmanima.

Pored obilne podrške koju je Mostar primao tokom proteklih 13 godina međunarodni novac i dalje pristiže u Grad, a još više novca, tačnije milioni eura, bi bilo uloženo kao rezultat provedenih reformi, kao što je na primjer izrada urbanističkog razvojnog plana. U isto vrijeme, međutim, Grad nije prikupio

značajne sume novca od poreza i prihoda od iznajmljivanja na koje ima pravo. Osim toga, neuspjeh u provođenju reformi te programa za rješavanje problema kadrovskih viškova samo dodatno opterećuje sredstva.

Zbog neuspjeha gradskih vlasti da riješe brojne preostale probleme, visoki predstavnik je prošle godine morao imenovati Norberta Wintersteina kao svog posebnog izaslanika za Mostar. Nakon tri mjeseca pregovora g. Winterstein je predložio niz rješenja, i dok je neka od njih usvojilo Gradsko vijeće druga su morala biti nametnuta. Ključni rokovi u vezi sa tim odlukama sada su veoma blizu.

Jedini način da Mostar prevaziđe ovu naizgled bezizlaznu situaciju jeste da politički lideri ovog grada adekvatno odgovore na izazov odgovornosti i preuzmu punu odgovornost za vlastitu budućnost, odnosno budućnost građana Mostara i samog Grada Mostara. Da bi uspjeli u tome, biće neophodno prevazići politiku takozvanog "nultog zbira" koja je obilježila politički život u ovom gradu.

Kako je visoki predstavnik i specijalni predstavnik EU napisao u novinskom članku objavljenom ove sedmice: "U uspješnoj demokratiji jedini način da dobijete ono što želite je da osigurate da i drugi dobiju ono što žele. Ova sposobnost da se razumije šta to drugi žele i da se pronađu kreativna rešenja i tako pomire različite težnje predstavlja osnovni uslov za prosperitet i sigurnost."